

欽定平定教匪紀略

欽定平定教匪紀畧卷一

嘉慶十八年九月十二日亥

聖駕自木蘭迴蹕駐兩間房直隸總督溫承惠奏言
本月十一日接據大名道府飛稟內稱河南滑
縣老安地方有邪教黃興宰黃興相兄弟並宋
姓爲首興立天理會於初七日聚衆三千餘人
白布纏頭放礮滋事滑縣城池已失縣官被戕

直隸長垣縣境與滑縣毗連該縣知縣趙綸查
知本境亦有習教之人前往查拏被教匪圍住
現無下落並聞教匪已奔河南考城及山東曹
縣一帶大名府知府莫景瑞已馳往長垣督同
典史把總守護城池大名道約可清阿在郡城
防守又據東明縣知縣朱煥稟報情節相同並
經該縣盤獲長垣縣南樂集人姜復興訊據供

稱此教爲首者俱係滑縣人長垣亦有習教者等語臣查滑縣教匪膽敢於

光天化日之下聚衆肆逆戕官陷城殊堪髮指必須

趕緊撲滅免致蔓延臣現在飛調臣標兵一千

名提標兵一千名宣化鎮標兵一千名正定鎮

標兵一千名酌派鎮將分帶一面飭司籌撥糧

餉星馳前赴大名及河南山東交界處所相機

剿捕並飭天津鎮道酌帶官兵於河間府屬山東交界處所防堵臣於跪請

訓示後卽與提督臣馬瑜起程馳往督辦再臣初三

日出省先於初二日接據山東撫臣同興密札

拏獲金鄉縣教匪崔士俊等三十餘人供係長

垣縣人徐安憚傳授囑令密拏臣卽密委臣標

中軍副將舒凌阿撫寧縣知縣周衡立時馳往

查拏尚未接據稟報今滑縣教匪卽於初七日
起事并奔赴河南考城山東曹縣一帶可見與
山東教匪實係同夥

同日直隸按察使慶格奏言臣於九月初十日

據大名府長垣縣典史劉世治稟稱知縣趙綸
風聞縣屬東北鄉葦園村有邪教伏匿於初六
日午刻帶領書役密赴訪查申刻據跟役趕回

報稱該匪徒等已聞知消息忽來多人頭纏白布身穿白衣手執器械將知縣趙綸圍住扎傷並扎傷書役數人該典史現在會同城守營把總防守城池監獄等情並據大名府知府莫景瑞稟稱該府接據稟報卽會同營員挑帶兵役馳赴擒捕又據東明縣知縣朱煒稟稱探聞該匪徒等已將長垣縣九級集一村搶刦赴山東

曹縣一帶逃奔又河南滑縣白家集有宋姓亦
係邪教各等情臣一面飛報河南山東巡撫派
委員弁兵役一體截拏一面飛咨正定鎮臣拴
住相機接應並令地方官安撫居民無致失所
奏入

上御行殿召見溫承惠及提督馬瑜

命溫承惠爲欽差大臣馳往長垣滑縣一帶統兵剿

金文
卷之二
四
辦

又奉

旨派護軍統領富蘭副都統格布舍御前頭等侍衛蘇爾慎乾清門三等侍衛伊勒通阿額勒精額三等侍衛蘇倫保阿勒罕保副護軍叅領諾木齊護軍校蘇清阿俱隨同溫承惠前往

又奉

旨派陝西提督楊遇春選帶將弁馳赴大名一帶協

同溫承惠剿辦

同日

上命軍機大臣傳諭署河南巡撫熱河都統高杞曰

本日溫承惠奏河南滑縣老安地方有匪徒黃興

宰黃興相兄弟並宋姓爲首興立天理會於本月

初七日聚衆滋事滑縣已失縣官被戕直隸長垣

縣亦有習教之人并聞教匪竄往河南考城及山東曹縣一帶現在睢州二堡黃流漫溢台斐音馳往該處下游被水一帶查辦災務高杞此時若尚未起程離豫著卽挑帶將弁兵丁督同河北鎮總兵色克通阿星夜前赴該處加意防範並嚴飭沿河文武員弁嚴密防堵勿令偷渡河南致形滋蔓高杞俟方受疇到任後再來京赴熱河都統之任

上又命軍機大臣傳諭山東巡撫同興曰本日溫承
惠奏河南滑縣老安地方有邪教黃興宰等興立
天理會聚衆滋事直隸長垣縣境亦有習教之人
並聞教匪南竄往河南考城及山東曹縣一帶並
據慶格奏稱探聞匪徒等已將長垣縣九級集搶
掠赴山東曹縣一帶逃奔各等語現在匪徒聚衆
滋事總以迅速撲滅勿任蔓延爲要該撫卽挑派

將弁兵丁於邊境扼要處所堵截嚴拏其爲首起
事各犯務宜剿捕淨盡無致漏網被脅之人並當
設法解散出示曉諭勿令裹脅者多致滋株累

十三日

丙子

聖駕至要亭駐蹕直隸布政使素納奏言竊

臣查辦

南三府賑務先至順德府城正在查勘各屬災

歉情形初九日接據長垣縣典史劉世治稟報

該縣知縣趙綸風聞該縣東北鄉離城十八里之葦園村有匪徒習教情事當卽於初六日密往查拏忽來多人身穿白衣手執器械將趙綸圍住扎傷跑回跟役一人不知該縣下落等語又據東明縣知縣朱煒稟同前情並稱縣屬齊五集民人張文典首告伊係鐵匠營生初五日有長垣縣南樂集人姜復興托伊打鋼刀十把

給與式樣情有可疑該縣當將姜復興拏獲訊據供稱係長垣縣人與本村王順天入教爲首同滑縣白家道口宋義升長垣縣馬寨村馬文隴共分四層名天理會每層約有二三百人朔望行香念咒原約九月初九日邀齊行善本月初五日曾托張文典打刀等語隨將該犯收禁初十日臣行抵廣平府臨洛關地方復據長垣

縣典史劉世治稟報初七日有葦園村民人王
白小赴都司陳夢熊處首告知縣趙綸被害次
日陳夢熊帶領兵勇將屍骸搶出看明趙綸遍
身有傷身首異處當同其子趙錦備棺盛殮印
信貯庫又據開州知州于曉稟報探得東明縣
城被圍該州相距甚近勢甚危迫該州外委馮
世立拏獲潛來州城探信之教匪李三聾李信

成二名訊據供稱係滑縣謝家莊人俱在教內
每人均有白布三塊頭上腰間衣襟各縛一塊
并墨書奉天開道四字等語伏思該犯等既已
戕官圍城必須厚集兵力一鼓殲擒方不致蔓
延滋事且開州東明長垣三州縣在在與河南
接壤必須分兵把守免致滑縣之賊闖入直境
臣查順德廣平大名三府存城之兵每處不過

一百六七十名不敷抽調必得於正定鎮所屬

各營內酌量調兵一二千名方資堵剿臣正擬

咨調間適新授熱河都統高杞由河南行抵臨

洛關與臣晤商意見相同臣等卽一面飛咨正

定鎮臣拴住星夜帶兵二千名赴援一面馳赴

大名府相機彈壓

熱河都統高杞奏言臣自河南起程進京於初

九日行抵直隸之邯鄲途間與直隸藩司素納相晤該藩司將直隸長垣開州東明各州縣稟報邪教滋事各情告知臣一面札調正定鎮標

弁兵迅速前來一面率同藩司素納馳赴大名一帶督飭查辦均奏入

上命軍機大臣傳諭溫承惠曰據素納奏接據東明縣朱煒稟報縣屬齊五集鐵匠張文典首稱有長

垣縣南樂集人姜復興托伊打鋼刀十把伊因情
有可疑赴縣呈首該縣於是日盤獲姜復興究出
伊與滑縣白家道口宋義升長垣縣馬寨村馬文
龍夥同習教曾托張文典打刀該縣當將該犯收
禁又於初十日接據長垣縣典史劉世治稟報有
民人王白小向都司陳夢熊處首告知縣被害該
都司帶領兵勇搶出該縣屍骸看明遍身有傷身

首異處又據開州知州于曉稟報東明縣城已被
圍勢甚危迫等語該匪等聚衆戕官圍城猖獗可
恨已極且俱用白布纏頭身穿白衣看來竟係邪
教並非饑民著溫承惠卽飛飭富蘭速選弁兵帶
領趕赴該處堵剿毋令向各處竄逸該督俟兵力
到齊卽統率師干一鼓殄滅至擒獲醜類如有白
布纏頭查係真實賊犯卽概行正法若無辜被脅

之衆不可株連該督當仰體朕意總以安民爲要
其首逆黃興宰黃興相宋義升等犯就獲後卽派
委乾清門侍衛及文武妥員嚴密解京候朕親訊
處以極刑以彰國憲至長垣縣知縣趙綸如平日
居官尚好猝被戕害卽奏明賞給卹典如別有劣
蹟毋庸置議鐵匠張文典率先到官舉報尚知畏
法該督查明酌量獎賞

上又命軍機大臣傳諭高杞曰高杞行抵直隸臨洛
關接見藩司素納聞知匪徒滋事卽馳赴大名一
帶札調正定弁兵督率查拏所辦甚是昨已派令
溫承惠同提督馬瑜前往長垣一帶堵剿直隸地
方無須高杞在彼督辦現在方受囑到任尚須時
日台斐音因睢州下汎黃流漫溢親赴該處查辦
撫卹事宜著高杞遵照前旨速行赴豫到彼後仍

接署河南巡撫印務所有豫省一切查拏防堵俱
責成高杞悉心經理高杞於接印後卽選帶將弁
兵丁親赴滑縣密查匪徒起事根由並查首犯黃
興宰兄弟現在是否屯聚滑縣或分或合據實具
奏並分派弁兵嚴密防堵其黃河口岸尤應選派
文武員弁小心防守將沿河船隻悉令停泊南岸
勿致賊匪偷渡又形滋蔓

上又命軍機大臣傳諭同興曰同興前次奏拏獲金鄉縣編造歌詞斂錢惑衆之匪徒李允魁崔士俊張文明等十八人現據溫承惠奏接據該撫札稱教匪崔士俊等三十餘人供係長垣縣人徐安帽傳授囑令密拏今長垣縣又有戕官之案東省與長垣接壤該匪徒等同習邪教聲息相通於戕官搶刦之後既經逃往東省自係糾結黨與今閱數

日未接同興奏報甚爲懸厼山東曹單鉅野一帶
順刀會梟販匪徒甚多且與直隸河南現在滋事
之處境宇毘連現派令溫承惠帶兵由北堵剿高
杞帶兵在河南察防西南其東路專責成同興防
堵該撫卽選派精銳弁兵迅速親自帶赴東省邊
界嚴密偵緝勿令匪徒乘間闖入東境潛相勾結
致滋蔓延再前該省拏獲之崔士俊等三十餘人

現在監禁在獄著該撫卽嚴行訊鞫是否與黃興
宰等係屬一黨一面錄供具奏卽一面將該犯等
先行正法並多發告示剴切曉諭居民所有查拏
懲辦者俱係鄰省滋事亂民斷不株連無辜以靖
民心爲要

十四日丁丑

聖駕至密雲駐蹕溫承惠奏言途次接據東明縣知

縣朱煒稟報該縣被賊撲城把總梁得貴先帶
兵役殺傷賊匪十餘人經該縣與把總勸諭紳
民鋪戶曉以大義各捐錢米雇人守城並有武
生張得正吳士登二人格外踴躍將城垣破損
處所粘補完好該縣等晝夜防範竟可無虞而
縣城數十里之外火光紛起至長垣縣趙綸被
賊戕害業已查明屬實經藩司飭委試用通判

周克家前往署理又據杜勝營都司陳夢熊稟
報帶領兵勇二百餘名前往長垣葦園村剿捕
知賊匪潛匿王盡實家該都司用鎗轟擊賊匪
仍不肯出隨於王盡實家搜得趙綸首級屍身
送縣殯殮該村東南突來賊匪數百人接應村
房中賊匪出而夾攻互有殺傷搶獲賊匪無字
大白旗一面小白旗三面上書奉天開道字樣

刀械十餘把生擒賊匪二名賊勢漸退該都司亦退兵守城該縣城池堅固署事之員已到亦可無虞又開州城內亦經知州于曉雇募民夫守城兼有兵弁防守該州西鄉與滑縣交界之處各村人心甚齊防堵嚴密此時大股賊匪均在滑縣老安一帶屯聚直省不過間有習教之人希圖策應並有無藉之徒乘機搶竊卽日大

兵聚集不難一鼓殲擒現在正定鎮總兵已於
初十日帶兵六百名赴長垣一帶其臣標所調

官兵亦於三十四五六等日分作四起

啟行官兵陸續大集臣昨日面奉

聖諭賊匪不可過黃河以南誠爲扼要至論臣曾任

河南藩司知濬滑一帶界連彰懷二府山徑亦
宜嚴加防堵臣已札致護撫臣台斐音並河北

鎮色克通阿務須星夜帶兵防備西南兩路勿使竄至臨河近山地而該匪平壤奔竄卽易剿捕目下兵力未齊全仗該地方紳民自爲守禦必須資給口食臣已飛飭素納每縣酌給銀一千兩再直隸河南山東等處村莊向無土堡可守並飭素納出示勸諭俱令深挖濠溝易於保護即可藉免裹脅此亦堅壁清野之一法並

經飛咨豫東二省一體照辦至被戕知縣趙綸
向來官聲尙好可否量予

恩施恭候

欽定

同日河南河北鎮總兵色克通阿奏言臣於九

月初九日午刻接據衛輝府濬縣知縣朱鳳森

稟報初五日接滑縣札開該縣匪徒牛亮臣等

十餘人聚集匪徒打造軍器知會協拏當卽飭
差查得本縣大伾山東坡有數百人夜聚明散
現將城門緊閉一面練勇保護稟請迅卽發兵
剿捕同時又據濟縣稟報探得滑縣署中已被
匪徒殺死多命獄囚亦被劫放等情查牛亮臣
等以閭閻平民膽敢嘯聚匪徒打造軍器殺入
縣署劫放獄囚深堪痛恨亟應上緊剿除臣隨

酌帶本標官兵五百名卽於初九日酉刻自懷慶府起程星夜前往相機剿辦均奏入

上命軍機大臣傳諭溫承惠曰溫承惠奏沿途接據稟報情形並酌籌防堵事宜賊匪敢於攻撲東明縣城可恨已極該縣武生張得正吳士登一經該屬朱煒勸諭卽踴躍防守補完城郭能知大義甚屬可嘉張得正吳士登俱著賞給把總以示鼓勵

知縣朱煒都司陳夢熊防守堵禦尚爲出力著溫
承惠先行記功如果始終奮勉再行保奏酌量施
恩長垣縣知縣趙綸平日官聲尚好因查拏匪徒
猝被戕害著照陣亡例賞給卹典據該督所奏情
形此時東明等處各州縣已守禦有備而大股賊
匪尚在滑縣屯聚本日據色克通阿奏稱接據濟
縣知縣朱鳳森稟報有匪徒牛亮臣等十餘人打

造軍器並據差查該縣大伾山之東坡聚有數百人現在該鎮已帶兵五百名於初九日星夜前往等語已降旨令高杞馳回豫省督同色克通阿相機堵剿並令嚴防西南兩路不令該匪等竄至臨河近山地而致滋蔓延該督此時應飭令富蘭迅速帶兵前進俟兵力齊全該督卽帶領大兵親赴賊匪屯聚處所一鼓作氣將匪徒聚而殲旃刻下

該督先於附近各州縣多發告示曉諭居民安靜
自守勿爲匪徒煽脅斷不肯稍有株累庶人心安
定不致再生事端至邪教一節此時斷不可提及
卽所發告示內雖經習教未曾滋事之人概不查
辦之語亦不可敘入將來擒獲匪徒審訊時亦不
必根究習教若有首告邪教者查無蠢動端倪均
姑置勿論或擬以誣捏以安反側該督總以剿辦

起事匪徒爲正務其無藉之徒乘機搶掠者亦從緩辦理不可顧小而遺大尤不可使無知愚民疑畏驚擾至附近村莊自爲守禦挑挖溝濠爲堅壁清野之助亦因賊之良法但民人自衛鄉間則可若鄉勇一節此次斷不得再踵陋習設該處鄉民有情願隨營打仗者該督務嚴行禁止曉諭該紳民等各保村莊俾匪徒等無從裏脅卽屬急公向

義平定後尚當量予獎賞至剿除逆匪係官兵之
責無須伊等協助該督熟籌全局卽當統率師干
速靖邪氛以副委任

上又命軍機大臣傳諭高杞曰本日據色克通阿奏
稱滑縣匪徒牛亮臣等十餘人在該縣大伾山之
東坡聚集匪徒數百打造軍器殺入縣署劫放獄
囚現帶兵前往剿辦等語昨已有旨令高杞接署

河南巡撫印務帶兵前赴滑縣查拏防堵現在色
克通阿已帶兵五百名前來著高杞卽迎合一處
統率弁兵前往剿捕若兵力尚少著卽添調豫省
官兵併力殲除其防堵機宜滑縣南距黃河迤西
卽係太行山徑該撫務周密布置嚴防西南兩路
勿使渡河奔竄亦勿令竄入山谷滋蔓難圖惟當
堵剿兼施蹴之於平原曠野之地則兵力易展四

面兜圍不難一鼓剿滅淨盡

臣等謹案詰奸慝刑暴亂聖王不得已而用

兵而其決幾也神則其成功也速教匪起於

滑縣與直隸大名各屬及山東曹縣一帶在

在毘連使其四散狂奔固已無可扼之險而

南竊渡河西竊入太行倘或鋌走自如恐非

旦夕之所能歲事矣我

皇上命將行師不逾晷刻而

諄諄然必以防堵爲先務其豫省西南兩路尤令加意嚴防故四面環圍

天戈所指我武維揚三閱月而首夥殲除迄無遺孽
蓋燎原不起實由於撲滅之神而滋蔓無虞
是在於芟夷之速也

十五日

戊寅

聖駕至鳩髻山駐蹕是日辰刻山東巡撫同興奏言

本年六月下旬據濟寧州金鄉縣典史梁玉振

稟稱民間傳言城南一帶有夜聚晝散之人蹤

跡詭異臣當密飭濟寧州知州王旭昇親往查

拏旋據稟稱訪有李允魁崔士俊張文明等編

造歌詞斂錢惑衆因聞拏俱各躲避適有臣前

此派往密訪之外委左壽寧訪出各犯姓名住

址開單面呈臣隨交該署縣吳培帶同左壽寧

前往按名查緝茲據吳培稟報到任後密查各匪犯俱已潛匿該令未敢張揚恐其遠竄隨佯爲示諭以前此訛傳必係與李允魁崔士俊張文明等挾有素嫌造言陷害今後俱宜安分不可妄生事端等詞在於四門並關廂張貼以示不再追拏而李允魁崔士俊張文明等果聞風

先後潛回經選帶幹役會同左壽寧馳往將單
內有名之李允魁崔士俊張文明孫戰標等首
夥匪犯十八人先後拏獲起獲編造算命避難
歌詞等件臣提省審辦一面密飭附近州縣查
拏夥黨一面督率兩司並濟南府知府凝圖悉
心推鞫據崔士俊供該犯與城武縣民劉燕認
識劉燕素習八卦離字教其教先令人跪香磕

頭授真空家鄉無生父母八字入教之始先給教師錢一二百文不等名爲根基錢每逢清明中秋兩節隨力致送錢文名爲跟賬錢俱交給卦主凡同教見面時駢食指中指往上一指名爲劍訣以作暗號崔士俊於嘉慶九年聽從劉燕入離卦教傳徒高鶴鳴等五名等語詰以教首何人據供離卦教係金鄉縣人王普仁傳至

張衡王敬修王敬修又傳至劉燕等供臣當卽

飛飭查拏經署金鄉縣知縣吳培將王普仁張

衡拏獲並據鉅野縣知縣王朝恩將劉燕等拏

獲先後解省復提該犯等隔別研訊劉燕等供

俱相符惟王普仁供出離卦教首郜添麟向在

東昌府聊城縣生理已於三年前病故該犯之

師係劉隴士已於嘉慶九年被水淹斃其徒王

敬修亦經病故現在張衡等所習離卦教由該犯輾轉相傳此崔士俊王普仁等傳習離卦教之先後情由也又據崔士俊供稱該犯先入離卦教上年八月間有同莊人高毓藻與直隸長垣縣陳家莊人徐安惆平素認識曾領徐安惆赴該犯家并稱徐安惆係習震卦教勝於離卦勸其改離歸震該犯遂拜徐安惆爲師徐安惆

亦教真空家鄉無生父母八字與離卦教無異
惟每日早午晚三次朝禮太陽兩手抱脣合眼
趺坐口念真空等八字八十一遍名爲抱功功
成可免災難今年二月間徐安帽復至該犯家
內口稱今歲九月以後交白洋刦行教之人刦
數到時老教首送給白布小旗一面插在門首
可免殺戮並稱老教首係劉姓等供詰其劉姓

何名何處並既以八卦名教此外各卦現在何處堅稱向來只知離卦自認識徐安帽方知又有震卦曾聽得徐安帽說起各卦已零落斷絕現俱無人今劉姓教首生於坎方合震離兩卦卽爲三才其老教首只知姓劉並究出已獲之張建木於崔士俊被拏後曾寫信知會徐安帽躲避等情再四熬審堅供不移此又崔士俊供

出認識徐安帽改入震卦教並妄說妖言之原委也復提集先後擎獲之劉燕孫戰標李允魁等四十餘人互相質證有由離卦教改入震卦教者有並未入震卦教者有初經入教並未聞知妖言者有供止圖免災禍被惑入教者查王普仁崔士俊等於

光天化日之下輒敢演習邪教傳播妖言斂錢惑衆

實堪痛恨且查八卦教之名由來已久屢經大
加懲創檢查厯辦教黨舊案其傳徒口訣內俱
有真空家鄉等八字可見黨惡相沿尙未盡絕
必須逐細根究以淨根株其徐安峒尤爲至要
之犯臣已密札直隸督臣溫承惠設法查拏以
便究明劉姓老教首籍貫住址嚴拏懲辦一面
飛查部添麟等是否實已病故其高毓藻一犯

亦經吳塘拏獲俟提解到省再行審擬具

奏再

臣

正在封摺間適又接據曹州府知府百歲

稟報直省長垣縣葦園村地方有邪匪傷官滋

事各有小白布旗號現有奔竄東省之勢已會

營調集兵弁在交界處所嚴密堵拏同時又准

兗州鎮臣陳廣寧咨會該鎮聞信後已酌帶弁

兵前赴曹州彈壓防堵等情臣接閱之下不勝

駁異查東省曹州各屬與直隸大名一帶毗連

倘葦園村匪徒卽係崔士俊所供之徐安帽若

竟闖入東境再行煽惑所關匪細臣於拜摺後

卽親自馳赴東昌就近查看情形相機辦理

是日未刻同興又奏言臣於十一日接據曹州

府稟報直省長垣縣有邪匪抗官滋事當經奏

明馳往邊界查辦十二日又據曹州府稟報探

得河南滑縣已被匪徒竄入縣官被戕相連各
州縣俱已戒嚴等情旋又據曹州府並菏澤縣
飛稟定陶縣城於初十日黎明被陷文武官員
存亡未保等語查此等烏合匪徒若非本境有
黨惡接應何敢竄入鴻張必須厚集兵力尅日
撲滅方不致蔓延爲害臣隨又飛調東昌營兵

一百名派赴曹州協防泰安營兵二百名赴東

昌聽候調遣河標中營兵三百名分赴金鄉鉅

野二縣彈壓又查臨清與長垣滑縣一水可通

已飛調德州駐防兵一百名赴臨清防範省城

重地兵力較單臣已調青州滿洲兵四百名來

省彈壓至省西各處均須兵力防守不能多調

是以又調登州鎮屬各營兵共六百名赴東昌

候撥共計派滿漢兵一千七百名臣拜摺後卽

帶運司劉清并本標兵三百名前往督辦至金
鄉縣已獲教匪崔士俊等若非仰托

皇上洪福先期拏獲難保不同時並起自未便拘泥
致該匪等稍稽顯戮臣於審明後卽將首惡崔

士俊趙清元李允魁孫戰標呂華容宋大勇劉
燕等七名恭請

王命卽行正法仍梟首各該處示衆以免奸人窺伺

其餘各犯飭司分別定擬懲辦

是日申刻同興又奏言

臣

本日行抵長清途次

又據曹州府百歲稟報毘連定陶之曹縣於十

一日亦被賊匪占踞等語鎮臣陳廣寧已由濟

寧一帶前往曹州

臣

正在繕摺具奏間復據濟

南府知府凝圖稟稱該府於前獲逆犯張建木

供詞內又復訊出一切逆情

臣

細閱之下不勝

駭異據稱該犯於去年八月間先後同崔士俊
拜直隸長垣縣人徐安帽爲師習學震卦教今
年二月間徐安帽告知現在河南滑縣城北五
里莊有卦主李文成原是當日震卦教王卦主
轉生囑令前往看望該犯隨同朱成方徐安帽
同至東明王學禮家先見王學禮又同至劉帽
明家暫住等候次日崔士俊同徐安帽也來見

了劉帽明劉帽明纔領到卦主李文成家向李文成磕頭李文成站著受禮吩咐說你們好生用功一劫能造萬劫之苦一劫也能修萬劫之福各人回家去罷凡事均問你師傅等語劉帽明又告知這教山西最多先收集山西好幾年了如今纔收山東收西邊的人是于克敬係山西人在滑縣城北二里住收南邊的是王學禮

收東邊的是劉幘明收北邊的是老劉爺自去
的老劉爺從前是彌勒佛下來死過多年如今
真性轉生不過四十多歲名叫劉真空又叫劉
林號霜木卽雙木原是單縣劉家莊人從前犯
事改姓黃逃出如今或姓林或姓劉或姓黃現
住京南二十八里大路邊沙河地方十六年六
月間到過滑縣道口集纔指稱李文成是震卦

王教主轉世劉帽明還說這四個頭領分路收人專等老劉爺收起北方就好起事有兩句話單等北水歸漢帝大地乾坤只一傳又徐安帽在路上告知十月三個節氣以後就是白洋刦白洋刦前七天要把白布小旗普律同時傳遍各處應手並不打造刀鎗臨時隨便搶用凡沒旗子人家盡行殺戮同教中人各束一根白帶

領上插白布小旗上寫奉天開道便是記號那時但留下行教的人纔分上下又另有四句話位列上中下才分天地人五行生父子八卦定君臣劉畊明還說白洋刦山西是洋頭河南是洋肚山東是洋尾所以先收山西次收河南後收山東等情查直隸長垣河南滑縣並東省定陶曹縣等處教匪滋事情形與所供無異謹由

五百里將原供呈

覽

同日護理河南巡撫布政使台斐音奏言本月
初十日辰刻臣於睢寧工次接據衛輝府知府
郎錦騏稟報本月初六日探聞直隸長垣縣匪
徒勾結滋事豫省滑縣境地切近經該縣知縣
強克捷盤獲匪犯牛亮臣等二十五名押禁一

面查拏逸犯詎該犯等糾夥多人於初七日進
城放火刦獄燒署縣官全家被害典史不知下
落該匪犯等業已竄入濬縣境內現在獲犯劉
崇化等九名訊係結盟用白布纏頭束腰爲號
並帶有旗幟嚴究何人爲首堅不供吐等情並
據該管河北道趙麟稟報情事相同河北鎮臣
色克通阿咨會業經帶兵就近督捕等情臣接

閱之下不勝忿恨卽飛調撫標河南等營官兵一千二百名親自管帶晝夜趨程馳赴滑濬二縣四路堵拏並咨會山東直隸地方文武各官一體防堵其黃河以南開封等屬災賑事宜飭令各委員會同該管道府及州縣等實力經理均奏入

上命軍機大臣傳諭溫承惠日本日同興奏審金鄉

匪犯崔士俊供稱該犯先從城武縣民劉燕傳習八卦離字教上年八月間又從直隸長垣縣陳家莊人徐安帽改習震卦教徐安帽曾告以今歲九月以後要交白洋刦屆時老教首送給白布小旗一面插在門首可免殺戮又據獲犯張建木同供本年二月間徐安帽亦曾到過伊家迨崔士俊被拏該犯曾寫信知會徐安帽躲避等語徐安帽一

犯前據溫承惠奏稱接據同興知會已派副將舒凌阿前往密拏現在長垣縣聚衆滋事是否卽係徐安帽爲首著溫承惠於剿捕時確實查明具奏正在降旨間又據同興奏稱據曹州府並菏澤縣稟報定陶縣城於初十日黎明被陷文武官員存亡未保同興現已派兵分赴曹州東昌等處彈壓並親帶劉清率本標兵三百名前往督辦等語此

股定陶賊匪是否係由直隸長垣竄往抑由河南滑縣竄往或係該縣另起之賊現降旨令同興督兵往剿將賊匪由東北逼向西南其河南邊界又降旨令台斐音將所帶兵一千二百名全數交與高杞帶領防堵溫承惠當督催直隸派出鎮將兵丁迅速前往合力剿捕務期一戰成功其定陶現在賊匪並飭屬查明原委先行由驛速奏

上又命軍機大臣傳諭溫承惠日本日申刻又遞到
同興本月十三日由五百里馳奏之摺內稱接據
曹州府百歲稟報賊匪於十一日續陷曹縣在彼
佔據現在兗州鎮總兵陳廣寧已由濟寧帶兵馳
往同興亦由東昌集兵前進剿辦等語賊匪於數
日之間將定陶縣兩處攻陷漸向東南肆逆看
來並非東省另起之賊自卽係長垣滑縣等處賊

匪相率竄往刻已降旨派徐州鎮總兵沈洪帶兵一千名由江省自南而北堵剿前進城固此時旣向東竄則長垣東明開州一帶賊蹤想已漸遠溫承惠卽當迅統大兵由長垣滑縣一帶進發如該二縣已無賊屯聚卽探明大股賊匪所在直赴曹州定陶一帶與東省堵剿之兵併力夾擊上又命軍機大臣傳諭同興日本日辰刻遞到同興

審訊匪犯崔士俊等一摺並據片稱接據稟報聞
長垣縣匪徒抗官滋事調兵堵截等語正在飭諭
該撫嚴防邊境並傳諭朱錫爵劉大懿將崔士俊
等犯速提審擬卽行正法茲於未刻遞到該撫奏
摺據稱將已獲之匪徒首惡崔士俊等七名先行
正法俾免奸人窺伺所辦甚是並據奏定陶縣城
初十日黎明被陷文武各官存亡未保又於申刻

據該撫奏到毗連定陶之曹縣於十一日亦被賊
匪占踞看來賊勢鴟張自係直豫匪徒闖入東境
肆行劫掠該撫現在調集多兵前往剿捕著卽迅
速前進若能就地擒捕早爲撲滅固屬甚善如不
能剋期殲除該撫務由東北將賊匪逼向西南豫
省現有高杞帶兵防堵直隸溫承惠督率大兵前
往剿辦現已有旨諭令徐州鎮總兵沈洪選帶兵

一千名迅速由東南迎頭北上正可併力兜圍將
賊匪聚而殲旃該撫所轄地方遼濶務須布置周
密不可令匪徒再向東竄致滋蔓延至所稱臨清
地方與長垣滑縣一水可通該撫飛調德州駐防
兵一百名赴臨清防範一節賊匪如由水路東趨
豈一百名兵所能堵禦該撫當飭沿河州縣官將
附近船隻調令遠離毋令賊匪搶掠即可斷其來

路該撫嗣後具奏軍務事宜俱著用五百里馳遞
上又命軍機大臣傳諭江南徐州鎮總兵沈洪曰現
在直隸長垣河南滑縣山東曹縣定陶一帶有匪
徒滋事係由西北向東南一路奔竄著傳諭徐州
鎮總兵沈洪卽速挑帶健勇兵丁一千名由南向
北取道迎赴山東曹州一帶相機堵剿該總兵專
以堵截南路爲重不可輕率深入總勿使賊匪向

金匱要略 卷之二
東南四散奔竄爲要

上又命軍機大臣傳諭台斐音曰豫省因睢州下汎黃流漫溢前降諭旨令台斐音親往該處查辦撫卹事宜高杞馳回豫省署理河南巡撫專辦剿堵之事台斐音現帶兵一千二百名前往著於迎會高杞時將所帶之兵全數交與高杞帶領台斐音仍赴漫口處所幫同經理堵築及災區撫卹事宜

再現被賊匪蹂躪州縣亦應妥爲撫綏並著台斐
音迅速查明應如何施恩之處奏明候旨遵辦

臣等謹按書曰自作孽不可活教匪潛圖不

軌播造謠言以八卦教爲糾會之名以白洋

刦爲愚民之說傳徒輾轉聲氣相聯約日定

謀計圖讐起使金鄉教匪不先於八月破案

則滑縣起事之日勢將同時並舉使滑縣教

匪不先經該縣查拏則京城滋事之期安知其不北來接應今閱同興所奏金鄉崔士俊等四十餘犯悉經知縣吳培拏獲不能蠢動而滑縣牛亮臣等二十五犯因知縣強克捷盤獲押禁是以於九月十五之先倉猝起事期約一誤諸事潰散奸謀詭計敗於臨時所謂若或使之有不知其所以然者豈非

天不可違而

神之所助者順歟